



18. august 2009

UKA 2009/33

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

**Inuusuttut angerlarsimaffiup avataanut inissinneqarsimasut 19-iniit 23-inut ukioqalersimasut annertusakkamik paarineqarallarsinnaanissaminnut inatsimmik tunngavilikkamik neqeroorfigineqarsinnaanissaasa qulakkeerneqarnissaa siunertaralugu, meeqqanik inuusuttunillu ikiorsiisarneq pillugu Inatsisartut peqqussutaata allanngortinneqarnissaanik, Naalakkersuisut peqquneqarnissaanik Inatsisartut aalajangiiffigisassaattut siunnersuut.**  
(Inatsisartunut ilaasortaq Olga P. Berthelsen, Inuit Ataqatigiit)

### **Tunngavilersuut:**

Meeqqat inuusuttullu angerlarsimaffiup avataanut inissinneqarsimasut peroriartornermini imaannaanngitsunik misigisaqartarput. Misigisanik inersimasunngorunik nammattuagassaminnik.

Ukioq inersimasunut ilaatitaalerfik inuusuttoq 18-iliigaangat pisarpoq. Inuusuttumut ulloq unnuarlu paaqqinnittarfimmumut ilaqutarsianulluunniit inissinneqarsimasumut ukioq inersimasunut ilaatitaalerfik sakkortuumik allannguutaasutut misigineqarsinnaavoq, tamatumanimi ulloq unnuarlu paaqqinnittarfimmi ilaqutarsianiluunnit najugaqarneq kipitinneqartarmat.

Meeqqanik inuusuttunillu ikiorsiisarneq pillugu peqqussutip aamma ulloq unnuarlu paaqqinnittarfiit pillugit maleruagassat oqaasertalernerisigut inuusuttut 18-iliinerminni iperarneqartarput.

Taamaakkaluartoq peqqussummi maleruagassianilu 18-iliinerup kingorna ikiorsiinerup nangissinnaanissaa pillugu ersernerluttunik paasiuminaatsunillu aalajangersagaqarpoq.

Maleruagassat atuuttut paasiuminaapput akueriuminaallutillu.

Inuit Ataqatigiit taamatut siunnersuuteqarnikkut inuiaqatigiit kalaallit inuusuttortatsinnut immikkut inissisimasunut tigussaasunik neqerooruteqarsinnaanissaat anguniarpaat. Inuusuttut pineqartut tassaapput aatsaat inersimasunngoriartornermini periarfissarsiortussat inissiffissarsiortussallu.

Inuusuttut pineqartut peroriartornermini immikkuullarissunik misigisaqarnikkut immikkut ajortiasinnaasut, ikierusuttunik tapersersuerusuttunillu pisariaqartitsisarput.

Siunnersuutigisatta inuusuttut pineqartut annertusakkamik paarineqarallarnissaminnut inatsisitigut periarfissinnissaat qulakkiissavaa. Paarineqarallarneq tassaasinnaavoq inuusuttup nammineq ineqalernissaanik ikiuineq, tapersersortinik ikiorteqartitsineq, ilaqutariinnik annertoqutissaanik ikiorteqartitsineq il.il. Paarineqarallarneq aamma tassaasinnaavoq aningaasaqarneq aamma

ilinniagaqarnissaq pillugit siunnersuineq imaluunniit tarnip pissusiinik ilisimasaqartunik oqaloqateqartarnek.

Inuusuttut pineqartut allallumi ukiuni taakkunani pitsaaneruseqarnerumik inuuneqarsinnaanerannut inuiaqatigiit peqataasinnaappata qularnanngitsumik tamanna siunissami imminut akilersinnaassaaq, inuillu pineqartut piginnaassuseqarnerulerlutik imminnut napatillutik innuttaasutut inuiaqatigiinni peqataasinnaalissagaluarput.

Siunnersuut taama saqqummiutereerlugu inussiarnersumik oqallisigineqarnissaa neriutigissavara.